



ALBERT OLIVE / EFE

HILETA ELIZKIZUNAK VILEDACAVALLSEN. PPko zinegotzi Francisco Canoren hileta elizkizunak atzo egin ziren Viladecavallsen, eta bertara milaka pertsona hurbildu ziren. Jose Maria Aznar Espainiako presidentea, Generalitateko lehendakari Jordi Pujol eta Idoia Zenarruzabeitia EAEko lehendakariordea izan ziren, besteak beste.



DAVID AGUILAR / EFE

ELKARRETARATZEA LEHENDAKARITZAN. Juan Jose Ibarretxe EAEko lehendakaria buru zutela, Jaurlaritzako hainbat sailburu, ETak PPko zinegotzi Francisco Canoren aurka eginiko atentatua gaitzesteko, elkarretaratzea egin zuten Lehendakaritza. Argazkian, Inaxio Oliveri, Josu Jon Imaz eta Juan Jose Ibarretxe, besteak beste.



CRISTINA ABADIA / EFE

NAFARROAKO PARLAMENTUKO KONTZENTRAZIOA. Nafarroako Parlamentuan, bertako alderdi politikoetako hainbat buruzagi bildu ziren. Miguel Sanz presidentea dei egin zien ETaren aurka PP eta PSOEek adostutako ituna sinatu ez duten alderdi politikoei «gogoeta sakona egin dezaten».

«Sentimentalismoak utzi» eta ituna sinatzeko eskatu dio Gobernuak CiUri

Agntziak | MADRID

PPk eta PSOEek sinatutako ituna bere egin dezala eskatu zion, atzo, berriro ere, CiU alderdiari Espainiako Gobernuak. Pio Cabanillas Gobernuak bozeramailearen ahotan egin zuen Madril-ek eskaera hori, ostiralero egin ohi den ministro kontseiluaren ostean. Cabanillasek esandakoaren arabera, Espainiako Gobernuak CiUk bere «usadio nazionalistei eta sentimentalismo historikoei» jarraituz hartu du erabaki hori, eta sentimendu horiek baztertu eta ituna sinatu dezala eskatu zion.

CiUk itunarekin bat ez egitea gaizki ulertu daitekeela adierazi zuen Cabanillasek, eta «elkartasun falta horrek» lortzen duen gauza bakarra «terroristengan indarkeriarekin zerbait lortuko duten itxaropena indartzea» dela. Hala, beraien jarrera ez «erabiltzen» uzteko eskatu zion CiUri eta gainontzeko «alderdi demokratikoei».

Cabanillasek esan zuenez, Gobernuak uste du CiUk «laster» egingo duela bat PP-PSOE estatu itunarekin, «CiUren ibilbidea soilik Espainiako demokraziari ekarpenak egitearen testuinguruan ulertu baitaiteke». Gainera, Gobernuak ez du ikusten ituna ez sinatzeko arrazoirik, «soilik demokraten irizpide komunez, politika bateratuez eta indarkeriaren aurrean ez etsitzeaz hitz egiten baitu».

Bestetik, ukatu egin zuen estatu ituna euskal edo kataluniar nazionalisten ibilbide historikoen kontra doanik, «soilik EAJren egungo jarrera» delako kritikatzeko dena. Horren ondotik, EAJren kontra egiteari ekin zion Espainiako Gobernuak bozeramaileak. Hala, egun batean PP-PSOE estatu ituna «bazter-

Haien «elkartasun faltak», Pio Cabanillas bozeramailearen arabera, «terroristen itxaropena indartzen du»



ALBERT OLIVE / EFE

Jordi Pujol eta Jose Maria Aznar Kataluniako eta Espainiako presidentek atzo Viladecavalls-ko hiletetan.

PP-UPN BILERA

UPN itunarekin bat

PPk eta UPNk bilera egingo dute gaur Iruñean. Bertan litekeena da azken alderdi horrek PP eta PSOEren arteko itunarekin bat egitea. Bilera goizeko 10:30ean hasiko da UPNren egoitzan. Bertan izango dira PPren aldetik, Javier Arenas eta Pio Garcia Escudero, eta UPNtik, Miguel Sanz Nafarroako presidentea, Rafael Gurrea eta Jaime Ignacio del Burgo. Amaieran adierazpen bateratua egingo dute bi aldeetako ordezkariak.

tzailea» dela esatea eta «hurrengo egunean espainiarrak Euskal Herrian alemaniarrak Mallorcan bezala izango direla esatea» leporatu zion.

Itunarekin «lasaitasunez bat egiteko» deia egin du Zapaterok

Jose Luis Rodriguez Zapaterok ere estatu itunarekin bat egiteko deialdia egin zion atzo CiU koalizioari. Haren arabera, kataluniarrek «lasaitasunez egin behar dute bat» itunarekin. «Zintzotasunez uste dut kataluniar eta espainiar gehiengoen nahiari omenaldia egitea izango litzatekeela», adierazi zuen PSOEkoak. CiUren erabakiari «arbuiorik» ez diola egiten esan

zuen, eta «gogoeta» egin dezala eskatu zion. Izan ere, Zapaterok nabarmendu zuen itun hori sinatzea «batasunerako ahalegin garrantzitsu bat» izan dela.

Bere esku dagoen guztia egingo du Zapaterok hori lortzeko, atzo esan zuenez; eta gogoratu behar da hilaren 23an bilera duela Jordi Pujolekin.

ERREAKZIOAK

FRANTZIAKO KANPO
ARAZOETARAKO MINISTERIOA

«ETaren aurkako borrokan gure laguntza guztia izango du Espainiako Gobernuak»

Frantziako Kanpo Arazoetarako Ministerioak ETak PPko zinegotzi Francisco Canoren aurka eginiko atentatua «posible den sendotasun guztiarekin» salatu zuen atzo. Hildakoaren senitartekoei elkartasun guztia adierazteaz gain, Frantziako kanpo Arazoetarako Ministerioak azpimarratu zuen «ETaren aurkako borrokan gure laguntza osoa izango duela Espainiako Gobernuak».

ALEMANIAKO KANPO
ARAZOETARAKO MINISTERIOA

«Demokraziaren aurkako erasoak dira udal ordezkarien aurkako ekintzak»

Alemaniko Kanpo Arazoetarako Ministerioak atzo nabarmendu zuen PPko zinegotzi Francisco Canoren aurka ETak eginiko atentatua «erabat higuigarria eta demokraziaren aurkakoa dela». «ETak udal ordezkarien aurka egin ohi dituen erasoak guztiz mespretxagarriak dira, biktima horiek segurtasun gutxiago baitute». Alemaniko Kanpo Arazoetarako Ministerioaren aburuz, «demokraziaren bihotzari eraso egiten dioten ekintza hauek, hainbat alditan Espainiako herriak defenditu dituen eskubideak zapaltzen ditu».

**CONFECIONES
PiNEDO**

Era guztietako jaietarako jantziak

San Antonio K. / 11 - GASTEIZ

